

四庫全書

史部

欽定四庫全書

史部

山東通志卷三十五之一下

詳校官監察御史臣劉湄

檢討臣德生覆勘

總校官知縣臣繆琪

校對官助教臣卜維吉

謄錄監生臣袁瑩

欽定四庫全書

山東通志卷三十五之下

藝文志一五言律詩

奉和聖製經鄒魯祭孔子應制

唐張說

孔聖家鄒魯儒風藹典墳
龍駢迴舊宅鳳德咏餘芬
入室神如在升堂樂似聞
懸知一王法今日待明君

送裴校書從大夫淄川覲省

唐岑參

尚書東出守愛子向青州
一路通關樹孤城近海樓
懷

中江橘熟倚處戟門秋更奉輕軒去知君無客愁

與任城許主簿遊南池

池在濟寧州

唐杜甫

秋水通溝洫城隅進小船晚涼看洗馬森木亂鳴蟬菱
熟經旬雨蒲荒八月天晨朝降白露遙憶舊青氈

登兗州城樓

時甫父閑為兗州司馬

唐杜甫

東郡趨庭日南樓縱目初浮雲連海岱平野入青徐孤
嶂秦碑在荒城魯殿餘從來多古意臨眺獨躊躇

劉九法曹鄭瑕丘石門宴集

唐杜甫

秋水清無底蕭然靜客心
掾曹來逸興鞍馬到荒林
能吏逢聯壁華筵直一金
晚來橫吹好泓下亦龍吟

宿靈巖寺

唐
戴叔倫

馬疲盤道峻投宿入招提
雨急山溪漲雲迷嶺樹低
涼風來殿角赤日下天西
偃腹虛簷外林空鳥恣啼

官成武主簿作

五首

宋
王禹偁

釋褐來成武始知為政難
每簽逃戶狀羞作字人官
冷砌莓苔徧荒城草木寒
宦情銷已矣時夢釣魚灘

釋褐來成武徒勞自感傷位卑松在澗俸薄菜經霜逕
擁寒莎綠門橫古木蒼冠纓塵已滿未敢濯滄浪

釋褐來成武經春自愧多晨炊猶接續時雨未滂沱拂
榻驚巢燕陳書起蟄蛾惠民無政術尸祿竟如何

釋褐來成武閒思應舉時投人天下徧瘦馬雪中騎秋
卷何年中春愁到處隨如今名已遂爭敢話官卑

釋褐來成武携家別故鄉北堂微祿及南畝舊田荒籬
菊飛秋蝶庭莎叫夜螢無人慰孤寂窻月自淒涼

留別長山父老

宋
范仲淹

長白一寒儒榮歸三紀餘
百花春滿路二麥雨隨車
鼓吹羅前郡煙霞指舊廬
郡人莫相羨教子苦詩書

堯廟

在堯山

宋
范仲淹

千古如天日巍巍與善功
禹終平洛水舜亦致薰風
江海生靈外乾坤揖讓中
鄉人不知此簫鼓謝年豐

廣野軒

宋
張之才

城隅荒僻地瀟灑亦清虛
雅有林泉樂閒同郊野居
小

園春自好幽逕客來疎不學樊遲稼虞卿喜著書

咏新橋驛古槐

宋 文天祥

去歲營船隩今朝館汶陽海空沙漠漠河廣草茫茫家
國哀千古男兒慨四方老槐秋雨暗孤影照琳瑯

過汶河

宋 文天祥

中原方萬里明日是重陽桑棗人家近蓬蒿客路長引
弓虛射鴈失馬為尋獐見說今年早青青麥又秧

東平館

宋 文天祥

憔悴江南客蕭條古鄆州雨聲連五日月色徹中流萬
里山河夢千年宇宙愁欲鞭劉豫骨煙草暗荒丘

發東阿

宋 文天祥

東原深處所時或見人煙秋雨桑麻地春風桃李天
趙程頻問埃怯勇緩加鞭多少飛橋過噫吁是北船

博興風景

元 于 欽

霜風收綠錦萬頃水雲秋海氣朝成市山光晚對樓
舟車通北闕圖畫入南洲且食鱸魚美吾盟在白鷗

湖上早春

元 趙孟頫

谿上春無賴，清晨坐水亭。
草芽隨意綠，柳眼向人青。
初日收濃霧，微波亂小星。
誰歌采蘋曲，愁絕不堪聽。

濟州

元 貢奎

舊濟知何處，新城又作州。
危橋東去驛，高堰北行舟。
市襍荆吳客，河分兗泗流。
人煙多似簇，聒耳厭喧啾。

四知堂

時官堂邑令

元 張養浩

邑壯憐才弱，官微慮患深。
韋弦千古意，冰蘖一生心。
袖

有歸來賦囊無暮夜金三年何所得憔悴雪盈簪

我愛雲莊好四首

元 張養浩

我愛雲莊好溪流轉玉虹驚颺荷背白殘照鳥身紅遠
意微茫外真懽放浪中終身能若此甘作灌園翁

我愛雲莊好柴門俗客稀行田蟲撲帽坐樹蟻緣衣雲
水一銅鏡霜林萬錦機東岡陂故在辭聘未全非

我愛雲莊好衡門晝寂然苔香花覆砌石潤竹通泉獨
處蓬為室閒遊杖挂錢白頭鄉社裏未覺媿前賢

我愛雲莊好民風太古淳婦勤絲滿篋兒懶硯凝塵秦
系唐高士張融齊逸人只因疎散久每每忘冠巾

賦得鉅野澤送宋顯夫僉事之南山

元
余闕

隄上柳沈沈春蒲泛渚禽濟田東閭汶水北流深落
日依中沚浮雲積太陰微茫看不盡渾似別時心

登太白樓

明
劉基

小逕迂行客危樓含酒星河分洗水碧天倚嶧山青昭

代空文藻斯人竟斷萍登臨無賀老誰與共忘形

過往平

明
曾 榮

地旱空多井林疎遠見樓平山通縣界漂水入河流過
客詢張鎬鄉人說馬周北來多古迹那得更淹留

登岱

明
喬 宇

五嶽誰爭長東皇萬物先晦明分日月呼吸變雲烟厚
脈中盤地神功上配天云亭問封禪千古意茫然

百靈朝拱處空籟聽琅璈地據中原勝天臨下界高雲

山雙老眼江海一秋毫欲訪蓬瀛去從誰借六鰲

御帳坪

明
王守仁

危構雲烟上憑高一望空斷碑存漢字老樹襲秦封路
入天衢畔身當宇宙中短詩殊草草聊以記吾蹤

問鄭生登岱二首

明
李夢陽

昨汝登東岱何峯是絕峯有無丈人石幾許大夫松海
日低波鳥巖雷起窟龍誰言天下小化外亦王封

俯首無齊魯東瞻海似杯斗然一峯上不信萬山開日

抱扶桑躍天橫碣石來君看秦政後仍有漢王臺

仰天羅漢洞

益都

明陸 鉞

險絕陂門路悠然雲洞深潭空散餘瀝樹古接層陰白
鹿煙霞侶丹砂歲月心鳴絃坐秋石細和水龍吟

遊千佛山寺二首

明邊 貢

亭午登山寺淹留夕未歸涼風起高樹落葉滿僧衣城
郭寒煙聚樓臺暮景微京華十年客愁絕賞心違

雞鳴春日曉鐘落上方幽樹濕雲猶住山空翠欲流酒

牀隨客去詩草付僧收
虛羨岩栖子塵鑪不可留

泛舟北抵華不注夜從陸歸

明邊貢

浮舟出近郭落日半谿陰
水闊蒹葭淨山寒煙霧深
壺觴不盡興絲竹有餘音
獨恨黃花少猶煩隔浦尋

遊泉林

明季本

緣谿尋泗脈杳杳入泉林
虎浪常如吼龍津不計深
濠間莊子烏山下伯牙琴
徙倚渾忘倦歸來趨夕陰

過任城

明徐階

汶上孤帆遠任城四望開風流賀監宅寥落謫仙杯樹
色含秋冷泉聲帶雨回金龜復何在慷慨有餘哀

咏胡山中麓

山志作大湖
山在章邱

明
楊慎

中麓何山隱青邱太岳東藏書侔宛委問道即崆峒
鶴煙雲駕烏蟾日月籠相求天路迥惟許谷神通

靈巖

明
陶欽臯

暮入靈巖寺高林帶月華不堪歌四牡終得問三車塔
影秋山淨泉聲石逕斜上方人不到留燭照袈裟

東村即事二首

明 李攀龍

不謂幽棲處還堪抱膝吟
火雲千里駐片雨一湖陰
暑逼藤蘿淺涼生枯柏深
鮑山終日在知己媿黃金
夜半忽風雨層樓四面孤
雲盤華不注電劃大明湖
文豹連屏隱神龍抱劍呼
飛揚天地意垂老見吾徒

神通寺

明 許邦才

百里泰山陰千年號寶林
諸天聞說法初地問安心
古殿松聲合長廊月色深
夢醒禪榻寂清磬下雲岑

題甕口嶺

即古夾谷

明

王世貞

千秋此夾谷駐馬意徘徊
蒼嶺峯爭向青天線劃開
人疑懸索度水憶建瓶來
回首兵車地虛生命世才

過故滕城

明

王世貞

齊楚今何在滕猶舊日名
浮雲雙戰地落日一空城
野曠仍堪井山貧自不爭
遺編二策在終是魯諸生

大寧寺

在臨清

明

謝榛

久寄青蓮宇因之問上乘
自知閒有味不愧老無能
響

徹秋風樹寒生夜雨燈匡牀坐幽寂身似定中僧

過王右軍祠

明 李士允

逸少平生宅維摩幾代宮蘭亭無昔日祇樹但悲風墨
沼寒藤底書臺夕磬中向來塵迹感今古是談空

冶水

明 馮琦

如何滄海上風物似江南亂種王猷竹雙携戴仲柑樓
臺山對立煙雨水相涵欲共黃鸝語孤飛入翠嵐

遊赤澗小園

明 馮琦

雨過雲猶濕煙深徑轉迷乍聞人語響遙隔水聲西岸
抱孤村轉山連遠樹齊持竿聊寄興休擬釣璜谿

石湖

明
馮琦

空谷秋聲急飛流下石巖憑虛飄玉屑滿壑挂冰簾雲
竇長風吼苔花細雨霑盤渦深不測疑有卧龍潛

單父道中有感

明
于慎行

落日名城道荒涼可奈何蒿田人蹟少茅屋水痕多霞
散梁王岫琴殘處子歌停車問田父含涕說修河

中山寺

寺在蒙陰有石刻白太傅詩

明公鼎

梵宇隋唐上浮圖霄漢間吹簫鳴鳳下扶杖卧龍還淡
淡峯如笑嚶嚶鳥亦閒欲尋白傅跡疑是到香山

溜水

明鍾羽正

朔風何凜冽水結大河陰匹馬三齊道孤鴻萬里心乾
坤生事老霜雪故園深短褐從長夜無勞扣角吟

黃石公祠

東阿

明李問

留侯高世士萬戶亦徒封山下祠黃石人間伴赤松椒

漿今寂寞華表漫龍嵒惆悵荒庭側僊翁倘更逢

浣筆泉

濟寧

明 楊洵

青蓮浣筆處千載尚寒流堤遶孤城晚臺荒煙郭秋龍
蛇波欲動象緯夜仍浮為問鯨飛去何年到十洲

登奎山

日照

明 丁泰

沙浦山無數從高縱目看一拳稱砥柱千古障狂瀾人
與星相聚天隨海共寬登臨莫長嘯足底有龍蟠

登戊巳山

安平鎮

明 謝肇淛

龍潭東注後禹力至今存水怪庚辰鎖山形戊己尊雲
帆千里目桑柘萬家村莫問前朝事孤城有浪痕

趵突泉

國朝
吳偉業

似瀑懸何處飛來絕壑風伏流根竊渺跳沫拂虛空石
破奔泉上雲埋廢井通錯疑人力巧天地桔槔中

題趵突泉兼懷李滄溟二首

國朝
馮溥

白雪樓何在空傳趵突泉一泓珠散彩數尺玉浮烟噴
薄蛟龍怒光瑩日月懸當年餘翰墨憑弔意茫然

王屋山前水潛流過濟南何人思采藻往歲想停驂靈
氣成三竇高風只一龕芙蓉華不注遙對夜深談

汶上道中

國朝
施閏章

半霽春陰好平沙趁馬蹄桃花村逕裏楊柳板橋西薄
霧籠香陌清流繞舊隄如何寒食後不見燕銜泥

登州

國朝
施閏章

郡僻滄洲外城孤絕島邊亂雲時結廬六月未聞蟬水
氣垂天闊濤聲裂地穿乘槎問牛女消息轉茫然

登大澤西峯至觀音岩宿

平度州

國朝

王士禎

西岩尋勝去嘯侶策孤筇橫壺峯千仞盤回路幾重洞
門陰白日磴道偃青松一榻禪燈夜悠然物外蹤

法慶寺閣上望雲門山

國朝

王士禎

祇園有珠閣高出碧林端落日垂平楚青山生暮寒歸
雲天際去遠樹坐中看今夕雲門月無人照戒壇

清明後三日鄒平西郭賦

國朝

王士禎

雨歇西原上鶯花事事妍
青山環縣郭白鳥破溪烟
墟落明流外園林霽景前
永懷蘭渚客行悵暮春天

泰嶽下作

國朝

王士禎

嶽路清和候氤氲望不稀
林園收宿雨石瀨濺人衣
班馬紅亭渡溪禽白練飛
買山隨處好終日戀清暉

徂徠懷古二首

國朝

王士禎

徂徠林壑美復愛竹溪清
應有雲霞侶幽居遠世情
釣竿想巢父酒態憶長庚
寂寞空山道寥寥千載名

當年石守道卜築亦於斯時際昇平日人傳慶歷詩子
孫留伏臘水石映茅茨直道今誰繼淒然汶水湄

留侯祠

東阿

國朝

王士禎

歲晏穀城頭惟餘碧水流何年紫芝侶共訪赤松遊暮
雪寒山道溪毛過客羞崎嶇滄海志不是為封留

雪中發東阿望魚山懷古

國朝

王士禎

山郭雪蕭蕭魚山望轉遙洛靈悲子建神女降弦超即
事成今古寒巖閉寂寥唯餘清梵在一遺旅魂消

陳思王墓下作

國朝

王士禎

昔誦君王賦微波感洛神今過埋玉地重憶建安人名
豈齊公幹讒寧殺灌均可憐才八斗終古絕音塵

望小洞庭

東平

國朝

王士禎

當日蘇司業風流此暫經重巖望超忽遠水界空冥積
雪明蠶尾浮雲下洞庭明朝新霽好迴首數峯青

于茲仙人祠

國朝

王士禎

我愛寒山好招尋白兔公還過于茲廟倚徙古祠空碧

水流春澗清猿嘯晚風傳聞駕鸞鶴來往月明中

女郎山

國朝

王士禎

卧興夢初起遙見女郎山雨過開奩鏡烟消露髻鬟靈
祠空翠裏瑤瑟碧雲間不是崔羅什何因奉玉顏

泛錦秋湖二首

國朝

王士禎

逸興愛秋水孤帆凌暮寒江湖多素侶飄泊任漁竿易
盡郢筒酒難忘楚澤蘭花山青十里落日放篷看

白鷺可憐色翩翩過稻陂荻花經雨落楓響入秋悲信

美真吾土新涼况水湄西勾橋上月應繫故人思

長山登河西閣

國朝徐夜

小閣臨闕隘凭欄此散愁山迴連市落城曲抱河流客
路秋風外人烟古渡頭不堪頻眺望曾是舊齊州

莊子釣臺

濮州

國朝胡惟一

濠濮幾陵谷荒臺猶未淪逍遙聊玩世魚我竟誰真秋
月懸鉤影遊絲駐釣緡坐觀徒有羨何處覓天民

泰安道中

國朝田雯

嶺背行人少秋聲塞鴈隨
蓼紅溪轉處山黑雨來時
崖樹懸羊棗村田絡兔絲
郵亭十餘里投憩夕陽遲

過郊城

國朝

田雯

野闊青山斷荒城白晝局
夕陽郊子國禿柳問官亭
泥路搖牛鐸風巢落鶴翎
可憐眠土銼一老少微星

郁處士年

百有九歲

觀海三首

國朝

毛奇齡

東去觀滄海南行泛百川
晨光開白地秋水屬蒼天
鼇

徙三山外鵬飛六月前空期羨門子採藥是何年
初日浮孤島洪波蕩九垓南傾從混沌東望見蓬萊
蜃起雲連湧鰈高水大來何當掛席去天畔一遭迴

秋色翻溟渤晨征企迷茫乘槎隨漢使鞭石笑秦皇
水氣粘星黑潮流滾日黃大瀛環盡處久已識扶桑

繫馬臺懷古

國朝
吳家禎

霸業當年事登臨刺綠苔鐘聲高閣度梵語法堂來
茅土先公履魚鹽仲父才驂騑多伏檻誰解識龍媒

七言律詩

題石門張氏隱居

曲阜

唐 杜甫

春山無伴獨相求，伐木丁丁山更幽。
澗道餘寒歷冰雪，石門斜日到林丘。
不貪夜識金銀氣，遠害朝看麋鹿遊。
乘興杳然迷出處，對君疑是泛虛舟。

石門春暮

石門他處多有以結可切曲阜舊志收之

唐 錢起

自笑鄙夫多野性，貪居數畝半臨湍。
溪雲祿雨來茅屋，山雀將雛傍藥欄。
仙籙滿床閒不厭，陰符在篋老羞看。

更憐童子宜春服花裏尋師到杏壇

題兗州泗河中石牀

李白杜甫皆
觸咏於此

唐 吳融

一片苔牀水漱痕何人清賞動乾坤
謫仙醉後雲為態野客吟詩月作魂
光景不回波自遠風流難問石無心
邇來多少登臨客千載誰將勝事論

題闕里

宋 呂蒙正

南沂西泗繞晴霞北岱東蒙擁翠華
萬里冠裳王者會

千年鄒魯聖人家高林蔽日無巢鳥古碣埋雲半吐花
瞻望宮牆空尙儂敢從滄海問津涯

寄題劉詔寺丞檻泉亭

宋趙抃

泉名從古冠齊丘獨在溪心湧不休深似蜀都分海眼
勢如吳分起潮頭連宵鼓浪搖明月當暑迎風作素秋
亭上主人留我語只將塵事指浮漚

水磨亭次孔宗翰韵

宋趙抃

兩洋一脈通機磨更引餘波達曲池高柳碧陰無酷暑

小蓮紅老惜芳時
臨流共賞休辭醉
按轡重來未可期
從此邦人為勝事
范君亭榭孔君詩

咏雲門山

益都

宋

趙抃

十里崢嶸到忽平
兀然如覺夢魂醒
石通幽室心生白
逕擁寒雲步入青
一水下窺疑絕線
兩山前列似開屏
重城歸去仍堪喜
歲稔人家戶不扃

再登表海亭偶作

宋

趙抃

氣象三齊古得名
時登表海最高亭
河源一水下青嶂

人物兩城如畫屏
邑報有秋期
俗阜守慚無術濟民靈
從來獄市并容地
且向樽前任醉醒

登蓬萊閣

宋 趙 并

山巔危構倚蓬萊
水闊風長此快哉
天地涵容百川入
晨昏浮動兩潮來
遙思座上遊觀遠
愈覺胸中度量開
憶我去年曾望海
杭州東向亦樓臺

治平乙巳重九

時官淄州通判

宋 韓 琦

苦厭繁機少適懷
欣逢重九啓賓壘
招賢敢竝翹才館

樂事難追戲馬臺
蘇布亂錢乘雨出
鴈排新陣拂雲來
何時得遇樽前菊
此日花隨月令開

富公亭

宋
歐陽修

截薛高亭古澗隈
偈攜佳客共徘徊
席間風起聞天籟
雨後山光入酒杯
泉落斷崖春壑響
花藏深崦過春開
麇麇禽鳥莫驚顧
太守不將車馬來

青州書事

宋
歐陽修

年豐千里無夜警
吏退一室焚清香
青春固非老者事

白日自為閒人長祿厚豈惟慙飽食俸餘仍是買輕裝
君恩天地不違物歸去行歌潁水傍

春晴書事

宋 歐陽修

莫笑青州太守頑三齊人物舊安閒
晴明風日家家柳高下樓臺處處山
嘉客但當傾美酒青春終不換朱顏
惟慙未報君恩了昨日盧公衣錦還

襄陽看山

宋 歐陽修

為愛南山紫翠峯偶來仍值雪初融
自嫌前引朱衣吏

不稱閒行白髮翁向老光陰雙轉轂此身天地一飄蓬
何時麤報君恩了去逐冥冥物外鴻

九仙山

諸城

宋

蘇軾

風流王謝古仙真暫去空山五百春玉室金堂餘漢士
桃花流水失秦人困眠一榻春凝帳夢遶千巖冷逼身
半夜老僧呼客起雲峯缺處湧冰輪

雪夜書北臺壁

二首

宋

蘇軾

黃昏猶在雨纖纖夜靜無風勢轉嚴但覺衾裯如潑水

不知庭院已堆鹽五更曉色來書幌半夜寒聲落畫簷
試掃北臺看馬耳未隨埋沒有雙尖

城頭初日始翻鴉陌上晴泥已沒車凍合玉樓寒起粟
光搖銀海眩生花遺蝗入地應千尺宿麥連雲有幾家
老病自嗟詩力退空吟冰柱憶劉叉

謝人見和前篇

二首

宋 蘇軾

已分酒盃欺淺懦敢將詩律閼深嚴漁簑句好應須畫
柳絮才高不道鹽敗屨尚存東郭指飛花又舞謫仙簷

書生事業真堪笑，忍凍孤吟筆退尖。

九陌淒風戰齒牙，銀杯逐馬帶隨車。也知不作堅牢玉，無奈能開頃刻花。得酒強歡愁底事，閉門高卧定誰家。臺前日暖君須愛，冰下寒魚漸可叉。

再過密州次韻趙明叔喬禹功

趙名杲卿
喬名敘

宋
蘇軾

先生依舊廣文貧，老守時遭醉尉嗔。汝輩何曾堪一笑，吾儕相對復三人。黃雞催曉淒涼曲，白髮驚秋見在身。

一別膠西舊朋友扁舟歸釣五湖春

海上書懷

宋 蘇軾

鬱鬱蒼梧海上山蓬萊萬丈有無間
舊聞草木皆仙藥欲棄妻孥守市闌
雅志未成空自歎故人相對若為顏
酒醒却憶兒童事長恨雙鳬去莫攀

登州孫氏松堂

宋 蘇軾

萬松誰種已挺挺半嶺蒼髯映此邦
露重珠纓蒙翠蓋風來石齒碎寒江
浮空綠竹橫南閣倒影扶桑射北窓

坐待夕烽傳海嶠重城歸去踏逢逢

軾始於登州海上得白石數升如芡實可作枕聞
梅丈嗜石故以遺其子子明學士子明有詩次

韻

宋
蘇軾

海隅荒恠有誰珍零落珊瑚泣季倫法供坐令微物重
自註舊有
恠石供
色難歸致孝心純只疑薏苡來交趾未信蠙
珠出泗濱願子聚為江夏枕不勞揮扇自寧親

潮中觀月

宋
蘇軾

璃波千頃照神州此夕人間別是秋地與樓臺相上下
天隨星斗共沉浮一塵不向山中住萬象都從物外求
醉吸清華遊碧落更於何處覓瀛洲

趵突泉

宋
曾鞏

一派遙從玉水分晴川都灑歷山塵滋榮冬如溫常早
潤澤春茶味更真已覺路傍行似鑑最憐沙際湧如輪
層城齊魯封疆會况託娥英詫世人

峭山亭

宋
曾鞏

大亭孤起壓城巔屋角峨峨插紫烟
灤水飛綃來野岸
嵒山浮黛入晴天
少陵騷雅今誰在
東海風流事漫傳
太守自吟還自笑
歸時乘月尚留連

大明湖

宋
曾 鞏

湖面平隨水面長
碧天垂影入清光
一川雨露荷花曉
六月蓬瀛几簟涼
滄海桴浮成曠蕩
名湖槎上更微茫
何須辛苦求人外
自有仙鄉在水鄉

登華不注

宋
曾 鞏

虎牙千仞立巉巉峻拔遙臨濟水南翠嶺漱峯晴可掇
金輿陳跡久誰探高標特起青雲近壯士三周戰氣酣
丑父遺忠無處問空餘一掬野泉甘

北渚亭

二首

宋曾鞏

四楹虛徹地無隣斷送孤高與使君午夜坐臨滄海日
半天吟看泰山雲青徐氣接川原秀嘗碣風連草水薰
莫笑一樽留戀久下階塵土便紛紛

振衣已出塵埃外卷箔更當風雨間泉聲漸落石溝澗

雲氣迥壓金輿山寒河漠漠鳥飛去野路悠悠人自還
耕桑千里正無事況有尊酒聊開顏

水香亭

宋 曾 鞏

臨池飛構鬱岩堯櫺檻無風影自搖羣玉過林抽竹翠
雙虹垂岸下平橋深依美蓼魚爭餌清見寒沙水滿橈
莫問荷花開幾曲但知行處異香飄

環碧亭

宋 曾 鞏

水心還有拂雲堆日日應須把酒杯楊柳巧含烟景合

芙蓉爭帶露華開城頭山色相圍出眼底波聲四面來
誰信瀛洲未歸去兩川俱得小蓬萊

凝香齋

宋曾鞏

每覺西齋景最幽不知官事古諸侯一尊風月身無事
千里耕桑歲有秋雲水醒心鳴好鳥玉沙清耳漱寒流
沉煙細細臨黃卷疑在香爐最上頭

靜化堂

宋曾鞏

修巖巖巖背成陰行盡松篁一徑深好鳥自飛還自下

白雲無事亦無心客來但飲平陽酒
衙退嘗攜靖節琴
世路人情方擾擾一遊須抵萬黃金

閱武堂

宋 曾 鞏

五朝環治歸皇極萬里車書共太平
胡馬不窺光祿塞
漢家嘗隸羽林兵柳間自詫投壺樂
案下方安佩犢行
高枕四封無一事腐儒何幸得專城

題靈巖寺

宋 曾 鞏

法定禪房臨峭谷辟支靈塔冠層巒
軒窻勢聳雲林會

鐘磬聲高鳥道盤
白鶴已飛泉自漫
青龍無迹洞常寒
更聞雷遠相從樂
世道塵囂豈可干

表海亭

宋曾鞏

表海風流舊所聞
青冥飛觀一時新
山河十二名空在
簪履三千跡已陳
極目烟嵐九霄近
滿川樓閣萬家春
由來興廢南柯夢
且喜登臨屬後人

登太白樓

宋劉麟

暇日閒登太白樓
樓前洸水漾波流
新詩得句揮銀管

美酒當筵泛玉甌
村落人家分遠近
陂塘魚鳥自沉浮
何當喚起騎鯨客
醉倚天風詠不休

謁孔林

金
党懷英

魯國遺蹤墮渺茫
獨餘林廟壓城荒
梅梁分曙霞棲影
松牖回春月駐光
老檜曾霑周雨露
斷碑猶是漢文章
不須更問傳家遠
泰岱參天汶泗長

題靈巖寺

元
趙文昌

路入藤陰石磴涼
馬頭遙認贊公房
瓊羅天近雲煙濕

婆律風清草木香紅鶴飛來山隱隱玄猿啼處月蒼蒼
窮探自是平生癖拄杖直須到上方

題汶陽王太師彥章廟

元 郝經

不許乾坤屬李唐孤軍直與決存亡大梁僅得延三日
匹馬猶能敵五王誰意人間有馮道幸因身後遇歐陽
千年豹死留名在破塚風雲繞鐵鎗

高唐道中

元 米與誠

野橋西望見高唐城上依稀塔影長方朔古碑埋蔓草

晉文遺廟廢殘陽依依遠樹秋烟斷漠漠平沙故壘荒
笳鼓東來知候吏一聲驚起雁行行

登濮陽北城

元 楊飛卿

層城高絕一攀躋歲杪臨風客思淒燒入馬陵秋草黑
雁橫雷澤暮天低陳臺事往人何在曹國風遙望欲迷
牢落壯懷誰與語疎林殘照亂鴉啼

東方朔廟

元 于 欽

甲乙不焚珠璧帳百錢囊粟且婆婆殿前怒擲黃金戟

天上偷將紫玉珂班固有評真率爾揚雄祿隱果如何
漢初除却椎秦手只許先生逸網羅

初到濟南

元趙孟頫

自嘆生平少宦情龍鐘四十二專城青山歷歷空懷古
流水泠泠虛著名官府簿書何日了田園歸計幾時成
道逢黃髮驚相問只恐斯人是伏生

趵突泉

元趙孟頫

樂水發源天下無平地湧出白玉壺谷虛久恐元氣泄

歲旱不愁東海枯
雲霧潤蒸華不注
波濤聲震大明湖
時來泉上濯塵土
冰雪滿懷清興孤

勝槩樓

元 趙孟頫

樓下寒泉雪浪驚
樓前山色翠屏橫
登臨何必須吾土
嘯傲聊因得此生
簷外白雲來託宿
梁間紫燕語關情
濟南勝槩天下少
試倚欄杆眼自明

太白酒樓

元 趙文輝

火冷昆明棟宇新
笑談應覺半天聞
坐邀采石江頭月

卧看徂徠頂上雲寓意自知非嗜酒傷心誰與共論文
騎驄一去今何處雲海茫茫澹夕曛

登泰山

元張養浩

風雲一舉到天關快意人生有此觀萬古齊州煙九點
五更滄海日三竿向來井處方知隘今後巢居亦覺寬
笑拍洪崖詠新作滿空笙鶴下高寒

遊華不注

元張養浩

蒼烟萬頃挿孤岑未許華山冠古今翠仞刺雲天倚劍

白頭歸第日揮金攀援直欲窮危頂歌舞休教阻壯心
星月滿湖歸路晚不妨吟棹碎清陰

趵突泉

元 張養浩

繞欄驚視重徘徊流水緣何自作堆三尺不消平地雪
四時嘗吼半天雷深通滄海愁波盡怒撼秋濤恐岸摧
每過塵懷為瀟灑斜陽欲沒未能回

雲莊遣興自和二首

元 張養浩

中年纔過即歸閒好在河汾屋數間病裏檢書多為藥

老來忘世不因山翠翻平野
禾抽穎錦委深林筍脫斑
莫恨韶光太相促若非衰莫詎能還

人云五十未宜閒我道彭錢亦夢間
五斗折腰慚作縣
一生開口愛談山
荒邨未莫門先掩
老樹纔秋葉已斑
只恐溪翁厭喧聒
隔林遙喚野猿還

遂閒堂獨坐自和三首

元
張養浩

擊鮮醺酒有餘甘
種竹移花不是貪
世事灰殘心上火
年光絲盡鬢邊藍
地環赤縣神州九人共
山猿野鶴三

六載丘園凡六召小臣何德聖恩堪

世味寧同酒味甘野情不似宦情貪乘舟遠遁誰如范
拍板高歌每羨藍走狗僅能功第二臥龍竟使國分三
英雄事業無涯苦舉似高人一笑堪

至味何嘗有苦甘大觀初不校廉貪苔垣蝸篆斜行玉
柳岸鶯梭巧織藍飲興平吞雲夢九吟魂高繞華峯三
青編黃髮林泉下此樂惟應我輩堪

題靈巖寺

元
張會宗

人中慧惠居高地天下精藍占好山四絕名標清世上
十方僧聚白雲間二龍珠照看經靜雙鶴泉供洗鉢閒
蚤晚利榮韁鑠脫性通三教叩禪關

登岱

明
宋 濂

宮堯泰嶽拄蒼穹萬壑千巖一逕通象緯平臨青帝觀
靈光長繞碧霞宮凌晨雲幔天門白子夜晴搖海日紅
玉露金莖應咫尺舉頭霄漢思偏雄

登岱

明
方孝孺

振衣千仞思悠悠泰岱於今愜勝遊秦漢舊封懸碧落
乾坤勝槩點浮漚海明日觀三更曉風動天門九夏秋
更上雲端頻極目紫微光電閃吳鉤

早春過靈巖寺宿方丈

明
顧 弼

雞鳴山下靈巖寺丈室虛明絕點埃雲過紺崖龍藏出
雪消陰澗鶴泉來樹頭啼鳥春光早竹裏疎鐘曙色催
珍重老僧偏愛客謾揮如意說三才

周明堂懷古

泰安

明
畢 瑜

黍離詩自咏東周翠輦無因此地遊朝聘不聞來東帛
會盟誰識有諸侯聖賢述作光千古雜霸興亡付一丘
莫向高臺尋舊迹斷碑殘礫不勝愁

望長白山紀懷

明薛瑄

山迴長白重經過十世懷賢意若何飯粥事空荒古寺
讀書聲歇暗煙蘿中朝德業應難及西夏勲名更不磨
向晚憑誰話憂樂栢臺風靜月明多

遊靈巖寺

明薛瑄

路入山門景便幽，高風不斷石林秋。
照人霜葉紅於染，拂袖嵐光翠欲流。
幾過野橋橫絕澗，遙從古剎見高樓。
北峯真與天相接，更擬攀蘿到上頭。

梵宇深沉夜景遲，僧房禪榻果幽期。
竹鳴虛牖風過處，霜落寒巖月上時。
紙帳燭光團白玉，石爐香燼靄青絲。
紅塵馬首明朝別，只恐山靈解勒移。

闕里

明
李東陽

天下衣冠仰聖門，舊邦風俗本來敦。
一方烟火無菴觀，

三氏絃歌有子孫城郭已荒遺址在書文半滅古碑存
憑誰更續東遊記歸向中朝次第論

堯陵

濮州

明
劉忠

萋萋芳草帝堯陵一度春風一度青聖德信同天廣大
文章還發地精靈降神此日寧無薤占氣多年尚有冀
記取穀林遺蹟在赤龍常統墓前銘

鄒縣謁孟子廟

明
吳寬

鄒國叢祠古道邊滿林松栢帶蒼烟遠同闕里千年祀

近接宣尼百世傳獨引唐虞談性善力排楊墨絕狂言
功成不讓堙洪水萬古人思命世賢

留題靈巖

明
許彬

古剎幽深有路通四圍山擁繡芙蓉曇花尚逐馱經虎
靈雨嘗隨聽法龍東澗水流西澗月上方僧定下方鐘
五花新殿凌霄漢畫拱雕甍幾百重

靈山勝跡

寧陽

明
許彬

巔岼形勝小崑崙北斗天高手可捫一道金繩開汲路

金定日八ノ二
卷三十五之一下
千年石虎護山門漫空法雨曇花落闔殿香風貝葉翻
疑有真人曾掛錫毘盧福地總堪論

沂山

時詔額香幣
禱雨茲山

明
喬宇

岱嶽西來海向東屹然方鎮一何雄山川自與封疆限
雲雨能收造化功翠巘天空高落雁玉泉垂閣下成虹
明廷憂旱來香幣六事都歸一念中

咏趵突泉

明
王守仁

灤源特起根虛無下有鰲窟連蓬壺絕喜坤靈能爾幻

却愁地脈還時枯
驚湍怒湧噴石竇
流沫下瀉翻雲湖
月色照衣歸獨晚
溪邊瘦影伴人孤

謁庸生廟

明
毛紀

敗屋頽垣帶薜蘿
斷碑歲月記宣和
而今祭祀鄉人少
伊昔談經弟子多
雨砌行蛸留篆字
風林啼鳥想絃歌
我來仰止儀型在
敬采蘋花酌澗波

東阿王墓二首

明
黃哲

寂寂荒丘汶水濱
一間祠屋四無鄰
豪華絕代空流水

文藻千秋尚有神暮雨孤村聊駐馬春風芳草幾愁人
櫂歌鎮日喧前渡誰泊蘭舟薦綠蘋

風流獨擅建安才放浪深知帝子哀詞賦何人追勝軌
江山此地自高臺銀宮寂寞空岩閉玉盃荒涼牧豎開
徙倚寒林天欲暮一聲清角碧山隈

謁黃石公廟

明
黃哲

榆徑深深一草堂松階寂寂半斜陽青山遠近分齊魯
黃石英靈閱漢唐碑斷螭龍荊棘暗壇空鸞鶴檜槐蒼

鄉人要說傳書意故國風雲入渺茫

登岱

明
陳鳳梧

剛風吹上最高層寒氣稜稜骨亦清雲起半空方作雨
天臨絕頂忽開晴松濤坐聽千巖響奎壁行看五夜明
自信茲遊真不偶飄飄雙袖羽翰輕

瀑布泉

明
陳鳳梧

百丈崖高鎖翠烟半空垂下玉龍涎天晴六月常飛雨
風靜三更自奏絃蒼水珮懸雲片片珠簾洞織月娟娟

晚山倒著肩輿下迴首斜陽景更妍

范公泉

明
陳鳳梧

洋溪溪畔一泓清天表先憂後樂情惠政已占醫國手
遺泉猶著活人名薰風亭館來山色綠樹城闌送鳥聲
旋汲甘寒薦新茗滿腔涼思濯塵纓

千佛山

明
陸鉞

岱陰烟霧鎖龍宮香閣岵嵒翠巘重狂客偶携青玉杖
高僧長住白雲峯瑤燈萬象懸虛照松磬千巖起暮春

蓮社風流吾所羨
宦途禪榻未從容

范文正公祠

明
陸 鈇

寺門烟霧藤蘿障
丞相祠堂松檜開
地湧靈泉千澗落
僧傳香火百年來
調羹業著留青史
洗墨池空長碧苔
夜靜孤峯明月上
鐘聲偏到讀書臺

登華樓山

明
鄒 善

千巖萬壑境蕭疎
幾日幽尋得自如
疊石遙連滄海色
華樓高接太清居
仙人洞啟陽生候
玉女盆迎日照初

試問同遊蓬島侶可能此地即吾廬

登大澤山

明 鄒善

閒度樓谿暝色寒相將仙侶躡層巒摩雲頂上饒餐玉
邀月臺邊剝弄九羣石參差馴虎臥萬松偃蹇老龍蟠
乾坤此地堪留賞歷盡羣峯興未闌

蒙陰山

明 李炯然

仙人飛去向蓬山洞府無人敞不聞丹竈尚餘松燄黑
石牀惟有蘚痕斑月明綠樹猿空嘯日暝青山鶴自還

何日得捐冠冕繫此身來伴白雲間

董子讀書臺

明王賜

驅車斜日御河濱下馬陵邊草樹春功在六經宗孔孟
力陳三策貫天人廣川世遠丘園舊北斗城高廟貌新
却笑荀揚成底事空將文譽動儒紳

登泰山三首

明邊貢

岱宗山秀百靈屯壁立烟霄萬古存幽府化機盤地軸
上清真氣接天門霞標日觀青松麗春透龍池碧水温

薄暮振衣峯頂石蓬萊東眺海雲昏

北上天門石未斜罡風吹我度谿舂仙人洞古留丹鼎
玉女祠高護碧霞深澗千年猶凍雪陰崖四月始桃花
秦封漢禪俱寥落細讀穹碑感歲華

玉皇祠畔一凭欄絕頂風高夏亦寒北去塵沙通瀚海
西來天地是長安青雲迥隔三千里白日平臨十八盤
似有飛仙度幽壑鳳笙聲裊珮珊珊

遊千佛寺

明
邊貢

夕陽衰草路登登雨過秋山爽氣層松殿可因叅佛理
蘇牆聊為覓詩凭且拚酩酊陪仙侶莫把輪迴叩老僧
北望古城蒼翠裏萬家樓館炊烟凝

遊龍洞山二首

明
邊貢

島路縈迴洞壑深出塵風景愜招尋山園下界青天迥
日照中岩翠栢森浮世何須論去住病身原不厭登臨
釣磯無恙綸竿整悵望仙潭玉鯉沉

洞門黃葉鎖秋深野客來遊悵古今恍惚漫傳龍跡在

虛明真似佛光臨
蒼空日月流元化
目盡雲雷起大陰
昏黑下山蘿
逕遠殿中龕
磬裊餘音

廬山

明賈璋

廬山勝槩冠東黃
幾次登臨興未忘
雨過雲岩芝草綠
風生石洞藥苗香
高峯塔聳仙踪古
深井龍潛水氣涼
我欲凌雲飛羽翮
窮顛一笑海天長

田橫島

明胡以溫

如陣愁雲結不開
悲風連日度樓來
坐臨滄海矚孤島

悵望斜陽酒一杯慷慨當年多壯士蕭條千古歎殊材
英雄失勢尋常事劉漢於今安在哉

登安平譙樓呈韓銀臺

明 殷雲霄

漕渠橫亘三千里南北今看第一樓吳楚征帆天外落
海山佳氣望中收心扶紅日懸霄漢袖拂朱闌捫斗牛
漫俯中流舟楫穩銀臺功業合民謳

新嘉驛題壁

明 羅洪先

小亭深院落清秋賸草寒花對晚愁鳬鳥不疑逢故侶

藥欄端得遂重遊恨無石磴移雲武却有溪橋帶月流
迢遞故園松菊冷雪霜道路幾時休

登嶧山

明 羅洪先

花宮物色層層見寶地鐘聲遠遠聞滿目碧雲渾傍石
隔林黃鳥半呼羣始皇徒愧孤峯碣秦相空遺小篆文
興盡不妨歸去晚馬頭明月白紛紛

蠶口嶺

明 陳沂

萬嶺千山一道分向空盤踞歷青雲丹楓黃菊爭秋色

白石蒼崖共夕曛長劍倚峯當面立淨琴流水傍車聞
秦關蜀棧無踰此絕險真穿虎豹羣

勞山

明
陳沂

蓬萊之山橫插天大勞小勞青可憐清秋播蕩入滄海
落日縹緲生晴烟眼前此景出人世便可羽化凌飛仙
挹取南溟酌北斗枕石大醉雲峯巔

南天門

明
陳沂

望入天門十二重竄然飛霧半虛空千尋不假鉤梯上

一竅惟容箭括通風氣蕩摩鵬翮外日光搖漾海波中
欲求閭闔無人問但擬彤雲是帝宮

寄題會溪草堂

明文徵明

會溪溪水正湯湯柳色陰陰覆草堂一曲風煙足魚鳥
百年高潔寄滄浪晴磯自得供垂釣春水還堪著去航
見說主人方許國只應幽興未能忘

飲太白樓

明徐渭

城上高樓接大河城南池沼遠朱荷千年供奉飛盃地

一夜徐州上水歌露冷秋蛾爭彩燭川長風荻亂金波
客中行樂無逾此前夕中秋何處過

過魯橋

明
吳懋

忽見郵籤報水程客中無限故鄉情雲連翠巘尼山近
雨過平湖汶水清李札南來聊問俗仲連東去欲逃名
難乘吾黨歸興與轉羨遲遲是此行

南旺夜行

明
薛應旂

長安六月東歸客黑馬溝前夜放船楊柳月侵湘竹簟

芰荷風動水晶簾未酬禹穴藏書計却憶匡山種杏田
可奈塵途猶寄跡滄浪空賦濯纓篇

汶上公署

明王謳

兩鬢如蓬行路難高秋風露宿臺端雲藏畫角青山暮
月轉空城碧樹寒為客數年非樂土舊遊何日是長安
獨留三尺齊門瑟猶自狂歌醉裏彈

濟寧道中

明金大年

西北風塵擁斷丘旅魂中夜鬱鄉愁漢庭未上孫弘閣

濟水頻經太白樓，候鳥翩翩迷遠浦。
輕帆颯颯帶春流，十年來往青袍在。
贏得霜華滿鬢秋。

宿龍洞與魏使君同賦四首

明
李攀龍

迴壑深林繞梵宮，春來吟眺使君同。
空潭忽散三峯雨，暗穴常吹半夜風。
人擬二龍精自合，詩看五馬步逾工。
諸天坐失懸鐙色，明月先投入掌中。

使君春興滿綈袍，綵筆青山對濁醪。
望去天回雙闕迥，坐來雲盡一峯高。
蛟龍出入常風雨，鴻鵠拚飛自羽毛。

愧我淹留逢楚客攀援桂樹咏離騷

削成東壁五雲屏下有龍宮夜不扃斗柄故臨雙甕轉
月明常對一珠亭春回竹葉杯光白天逼蓮花劍氣青
坐久空山仙籟寂新詩獨為故人聽

秀色中峯獨不羣藤蘿二月已紛紛諸天近海金銀氣
雙峽長春錦繡文塔影半空懸落照溪流一曲灑浮雲
縱令洞口龍吟發郢調還須讓使君

與轉運諸公登華不注山絕頂

明

李攀龍

中天紫氣抱香爐
複道金輿落帝都
二水遙分青嶂合
一峯深注白雲孤
岱宗風雨通來往
海色樓臺入有無
不是登高能賦客
誰堪灑酒向平蕪

神通寺

明

李攀龍

相傳精舍朗公開
千載金牛去不迴
初地花開藏洞壑
諸天樹杪出樓臺
月高淸梵西峯落
霜盡疎鐘下界來
豈謂投簪能避俗
將因臥病白雲隈

青蘿館

明

李攀龍

十畝青蘿別館開使君登眺意悠哉風搖北渚清沙合
烟雜南山岱色來臺敞高秋深染翰庭虛斜日淨 杯
西鄰榮叟嘗還往帶索應同薜荔裁

過吳子玉函山草堂

明

李攀龍

玉函山色草堂偏恰有幽人擁膝眠樹杪徑迴千澗合
窻中天盡四峯連綠陰欲滿桑蠶月白首重論竹馬年
就此一樽無不可因君已辦阮家錢

遊龍洞寺

明

李攀龍

壁削芙蓉萬仞丹，禪林隱隱畫圖看。
人間勝地僧多占，洞裏諸天客到難。
雲傍龍來晴作雨，風從澗底暑生寒。
年來賸有烟霞癖，石畔長松好掛冠。

魏使君過宿鮑山山樓分賦

明

李攀龍

層樓風雨一登臨，把酒重論十載心。
楚客豈須題白壁，鮑山猶自見黃金。
褰帷上國風雲滿，伏枕中原日月深。
忽憶明光曾共被，那知萍梗到於今。

白雪樓

明

李攀龍

伏枕空林積雨開旋因起色一登臺大清河抱孤城轉
長白山邀返照迴無那嵇生成懶慢可知陶令賦歸來
何人定解浮雲意片影飄搖落酒杯

泰山四首

明
王世貞

縹緲琳宮接上玄
峒堯飛磴界蒼烟
峯迴洞壑紛俱拱
石坼松蘿裊自懸
過雨雙龍爭玉峽
擘雲孤鷲拄青天
平生故有崢嶸意
識爾應從太始前

奔崖瀑落擁晴雷
策石驅龍輦道開
匹練天縈吳觀出

金泥日射漢封回西盤瓠子河如帶東挂扶桑海一杯
莫向封壇論王氣祇應塵世有仙才

尚憶秦松帝蹕留至今風雨未全收天門倒瀉銀河水
日觀翻懸碧海流路轉千盤迷積氣誰從九點辨齊州
人間處處襄城轍矯首蒼茫迥自愁

壁立芙蓉萬古看削成松檜隱高盤中峯翠壓徂徠色
絕頂青收碣石寒梁甫吟成還自和茂陵書就欲誰干
依微白馬吳閭在欲向秋風問羽翰

雲門山二首

明
王世貞

芙蓉削立郡城西躡蹬攀岩徑欲迷忽有青天通箭括
初疑壁月掛瑤梯雲根半壓千峯小海氣全吞萬堞低
搔首狂歌吾不厭莫驚風雨妬新題

十二齊封自鬱然盪胸秋色鎖層巔危崖日月時雙墮
急雨蛟龍乍一穿鳥道白從杯底落薜衣青入鏡中懸
誇君更有天門在策杖春褰萬壑烟

寄訊蓬萊閣

明
王世懋

遙聞高閣俯蓬壺為問三山定有無雲暖蜃樓高結市
月寒鮫室夜沉珠驚湍檻外星河覆異域尊前島嶼孤
若遇安期應乞棗莫令秦帝石空驅

登泰山

明

徐中行

東嶽崢嶸迥不羣中峯瑞靄更氤氲天門雪盡河流合
日觀春晴海色分風起秦松常似雨氣蒸漢檢欲成雲
千秋霸跡終銷歇猶說相如封禪文

堯陵

濮州

明

李先芳

穀林山寺古堯陵片石依然尚可憑
萸草映階春寂寂
茅茨蔽屋覆層層
雙厓龍掛高松樹
孤塔僧然長夜燈
明祀九原歌帝德
放勳千載佐祈興

馬陵

明
李先芳

迴合長堤衛水秋
滿林黃葉荻颼颼
居人近指馬陵道
遺蹟遙傳瓦屋頭
昔日孫龐曾決勝
只今草木尚含愁
不知七國皆迷地
猶自停車弔古丘

莊子釣臺

明
李先芳

漆園為吏早知歸濮上垂綸願不違
浦樹千秋依斷岬
汀蒲一曲帶斜暉
掉頭往事隨流水
曳尾何人問釣磯
獨傍南華臺上望
逍遙天外大鵬飛

遊戊巳山

安平鎮

明
沈翰卿

千迴磴道望嵯峨
幾處烟局長薜蘿
野曠虞人獵麋鹿
水深鮫室隱黿鼉
盤桓共載春山酒
窈窕誰翻子夜歌
盛集文儒鏘玉佩
不妨長日駐巖阿

太白樓

明
沈翰卿

縹緲層樓霄漢隈
南城山色鏡中開
不知仙馭游何處
長擬星辰謫上台
林杪鶴巢珠樹遍
日邊鯨負海濤來
秦碑魯殿俱銷歇
未覺浮名勝酒杯

望嶽二首

明
顧紹芳

震嶽居然五嶽尊
中峯忽爾衆峯蹲
天含萬象平開闔
海浴雙丸對吐吞
終古松蘿清石骨
有時巉巖暗雲根
秦厓宋障俱陳迹
嗚咽幽泉與紙論

六龍馳道出雲邊
絕頂差莪更可憐
阿閣迥開羣帝府

晴闌微別九州煙即看嵩華疑無地却借滄溟別有天
漫道蓬萊應咫尺茂陵松柏正淒然

任城道中

明
顧紹芳

秋草依微落照明川原歷歷總關情千家網罟魚成市
兩岸菰蘆水向城白泛鷗羣將棹去青懸樹色帶帆行
雲邊暗指淮徐近十日遙拚盡旅程

登東郡望嶽樓

明
莫如忠

麗譙飛構倚嶙峋面面虛無迫絕塵忽向望中低岱嶽

始知行處逼星辰傳聞馳道猶餘漢指點巖松不辨秦
齊魯到今青未了題詩誰繼杜陵人

太白樓

明
莫如忠

縹緲層樓霄漢隈南城山色鏡中開不知仙馭遊何處
長擬星辰謫上台林杪鶴巢珠樹徧日邊鯨負海濤來
秦碑魯殿俱銷歇未覺浮名勝酒杯

遊岱麓普照寺

明
邵賢

招提隱隱倚崔巍紺宇周環般若臺斜日短筇山逕曲

石橋流水寺門開
浮屠證果真成幻
儒道淵源有自來
千載清風仰孫石
獨遺堂址向巖隈

登勞山

明
邵賢

坤軸危分鎮巨鰲
山如排戟戰方鏖
鼓鐘鏜鏜東西院
丹碧參差大小勞
石柱華樓闌海出
龍巖獅石倚天高
我來無限登臨興
點染風烟信綵毫

登岱

明
劉應時

東皇樓閣自天開
絳節高懸白玉臺
雨向仙人峯外過

雲從玉女峽邇來孤標捧日三千丈閣道凌空十八回
靈輿已看人世隔赤城何處訪蓬萊

題丈人峯

明
劉應時

丈人石上望羣仙吳越周秦指顧間過去青牛追不及
飛來白鶴杳難攀東皇細削芙蓉闕玉女深居虎豹關
咫尺蓬萊天路隔尋仙不遇只空還

登泰山

明
彭夢祖

星幢寶纛鎖烟空縹緲飛梯萬轉通天闕練光為白馬

峯高嵐氣作蒼龍
銀河欲迸仙人掌
丹竈猶藏玉女宮
聖代不求封禪草
相如詞賦笑徒工

過卞里謁仲子祠

明

錢達道

先賢宅里久湮沉
誰構崇祠泗水潄
大孝每餘風木恨
孤忠無負結纓心
山連鳬繹飛晴翠
松近徂徠起夕陰
瞻拜不禁懷古意
野花林鳥助長吟

王右軍祠

明

錢達道

右軍舊宅已烟蘿
斷碣猶堪辨永和
華表最憐人化鶴

黃庭無復客籠鵝
晒書臺迥斜陽滿
洗墨池荒芳草多
莫謂簿書妨吏隱
清風千古接鳴珂

過文登營

明
戚繼光

冉冉雙幡度海涯
晚烟低護野人家
誰將春色來殘堞
獨有天風送短笳
水落尚存秦代石
潮平不見漢時槎
遙知百國微茫外
未敢忘危負歲華

汜水

明
鄒魯

陵谷千年已變移
漢王壇坫總凌夷
成功本自收三傑

屈策原非仗六奇，古木昏鴉聲斷續。
春風宿草色參差，炎劉一代英雄事盡屬。
沉淪半截碑。

登馬谷山

海豐

明 楊 巍

平地巋然出一峰，登臨若在碧芙蓉。
盤河水繞疑奔馬，古洞雲深見蟄龍。
影落滄溟高氣象，路經葭葦少行蹤。
老僧已許岩頭住，為我先栽萬個松。

海嶽樓

明 王汝玉

十二朱欄影半空，元龍高臥定誰雄。
簷楹翠濕蓬山雨。

枕簟涼生弱水風物色橫陳詩卷裏雲濤飛動酒盃中
謫仙會有騎鯨便八極神遊路可通

除日登嶧山二首

明
葉向高

崑崙峯巒切帝居石門坐眺見青徐琅玕拔地千尋起
菡萏籠烟五色舒平野遙連邾子國荒臺誰辨客卿書
名山不少遊人跡若箇登臨是歲除

五華巖下白雲宮絕巘寒生萬壑風不向秦封窺片石
還從禹貢辨孤桐河流繚繞青天外海氣微茫秦岱東

自是初平鞭不到欲將靈跡問鴻濛

登岱

明

王弘誨

人間信自有丹丘汗漫聊從此地遊
玉檢金函空寂寞琪花瑶草自春秋
射牛不用儒生議望馬堪從聖蹟求
一自大觀歸老眼尋常指點徧齊州

雲門山二首

明

馮琦

矯首層巔御遠風晴嵐萬壑散鴻濛
乍驚閭闔通天上遙指河山落掌中
九疊雲屏高自掩千秋寶鑑照還空

未論三島神仙窟咫尺人間路不同

萬仞巔屹倚太空洞門深處碧雲叢
清秋白日懸孤月古木蒼崖鎖大風
疑有五丁開道路欲從四塞弔英雄
海氛東望頻翹首安攘何人仲父功

謁韓信祠

明
劉應節

仗劍登壇氣獨雄詎知烏盡却藏弓
去留已誤歸蕭相生死何須恨蒯通
故壘浮雲餘戰氣秋原衰草動悲風
漢皇豈少封侯約自是將軍不賞功

東阿王墓

明
于
玘

風流獨擅建安才，放浪深知帝子哀。
詞賦何人追勝軌，江山此地自高臺。
銀宮寂寞空巖閉，玉盃荒涼牧豎開。
徙倚寒林天欲暮，一聲清角碧山隈。

秋日集洪範池

東阿

明
于
玘

洪範池邊夕翠橫，開樽坐對石流清。
高秋寂寞魚龍影，古木蕭條風雨聲。
日晚樵歌臨渡起，夜深漁火隔林明。
平生自欲藏名姓，一枕滄浪夢不驚。

登嶧山

明 楊際會

翠壁蒼厓萬竅通誰將羣玉簇芙蓉
昂藏自有神靈護穿鑿翻疑造化工
秦蹟至今縈蔓草禹功終古紀孤桐
最憐往事多興廢邾國荒城夕照中

登香山寺

明 趙邦彥

驚嶺峒峩鎖赤扉長松恠石莽因依
徑攀日月梅林渺氣湧金銀慧界稀
初地雨醒蕉鹿夢諸天花灑芟荷衣
何顓莫訝耽禪境一入紅塵萬事非

泰山八首

明
于慎行

終古名山奠大東遙瞻雲漢倚穹崇
千峯明滅天高下萬壑晴陰氣鬱蔥
星土盤回元化轉仙閭繚繞百神通
真遊五嶽何當徧自躡煙蘿上碧空

玉闕朱樓萬仞端六龍輦道倚巔岼
懸崖翠磴雲中轉疊幃紅泉樹杪看
海色曛曛三觀曉秋聲蕭瑟五松寒
天門咫尺君應見比似人間路更難

忽出塵寰賦壯遊試從九點辨神州
浮雲直上千峯色

落日長懸萬里秋
紫塞東臨滄海斷
黃河北遶大荒流
秦封漢禪成丘土
留與人間不盡愁

倚杖高臨萬玉峯
氤氲陸海散芙蓉
寒聲半落天中雨
暝色低催澗底鐘
金檢誰探秦帝策
白雲猶起漢時封
君看十二侯王地
能出神宮第幾重

絕頂秋高上帝宮
茫茫一氣俯寰中
地盤河濟三州盡
天入秦吳萬里空
玉闕光連星斗上
丹峯影落海門東
亦知真宰多相藉
許倚烟霄兩劍雄

萬仞瑤壇冷夕曛斗邊三十六天分仙人洞府懸雙闕
玉女神房切五雲遊客自成梁父歎詞臣不草茂陵文
東皇舊握羣生紀海國河山翼聖君

高峯東望氣雄哉海色遙看萬里開三島春波涵日月
五城仙氣吐樓臺酒邊影吸金銀動杖底雲飛紫翠來
烟水茫茫徐福去至今不見報書迴

上宮夜色冷漫漫月轉層霄十二欄大地山河銀作海
中天樓閣玉為壇虛無靈境簫聲斷縹緲秋光練影寒

仙掌芙蓉看欲近轉從北斗識長安

遊虎窟南洞

明
于慎行

城上青山俯畫樓春來登眺思悠悠香臺雨色千峯暮
曲洞松聲萬壑秋落日遙懸平野樹浮雲忽傍大清流
共知康樂多豪興更見羊何接勝遊

雲翠山天柱峯

明
于慎行

攀蘿直上翠微巔峻削孤峯斗際懸標掛六龍迴白日
勢成一柱倚青天雲窻晚滴丹臺雨鳥道晴飛紫閣烟

岱嶽羣峯如萬馬西來雲氣總相連

重到南天觀追憶許鍊師

明
于慎行

舊向三山訪列真重來不道海成塵
峯頭鶴化猶疑夢洞口猿啼別是春
玉觀淒涼花似雨松壇寂寞草為茵
仙家日月還如此人代茫茫可更論

登嶧山

明
朱頤琢

鄒魯名山大嶧雄芙蓉如削挿晴空
崖邊細草千春碧澗底寒花五月紅
海色憑臨青玉杖僊音不散白雲宮

生來最厭塵寰累何日移家住此中

任城晚眺

明屠隆

二月任城花氣寒登高携酒倚層欄汀洲送目雲帆亂
隴阪驅車雪色殘商女春衣飄錦帶王孫夜獵鬪銀鞍
多情太白樓前月照入金尊萬頃寬

登光嶽樓

明屠隆

高閣崔嵬切太虛大荒東去獨踟躕憑陵白日雕窻合
陡挿中天繡柱孤萬里風塵連海岱千家烟火接淮徐

閒呼濁酒供長嘯一帶微茫見舳艫

登蓬萊閣

明
黃克纘

城列千燈錦幃開東風吹客上蓬萊天光海色春相映
疊鼓鳴笳夜急催鰲首三山含霧動潮頭萬馬拍空來
觀兵幸值妖氛息徙倚危欄一舉盃

謁海神廟

明
黃克纘

元氣茫茫接大清乘春一望水雲平雪花浮浪千重起
日色蒸霞四散明海上烽銷旗半偃津頭潮落棹空橫

馨香好答神靈貺莫遣鯨波又震驚

花林曠

益都

明

鍾羽正

天畔羣山下村澗溪迴合繞丘樊桃源地暖花連塢
栗里人閒柳覆門萬疊雲霞蒸曉日幾家雞犬傍春原
生平雅有尋芳興小結衡茅此避喧

謁劉先主廟

明

周汝觀

炎鼎東看王氣摧年來帝胄逐塵埃神龍未借風雲便
鞍馬徒驚歲月催睥睨孤城烽火急縱橫列郡鼓鼙哀

劍門猶是偏安業落日中原首重回

詠漢濟陽宮

明
王崇獻

瑞色當年映薜蘿明明天意竟如何可憐漢世衣冠老
爭獻新朝雅頌歌十葉山河歸誼主九天雨露孕嘉禾
一從息馬昆陽後含哺誰知帝力多

九日登女郎山二首

明
高應杞

秋高雲物正霏微一脫風塵一息機露畹幽芳人寂寂
霜林疎影鴈飛飛青山舒嘯驚時變白首耽吟與世違

最是不堪臨眺處孤城搖落暮煙稀

長風萬里接蓬萊勝覽慙非作賦才漫掃晴雲楓亂落
却憐衰草菊初開古今豪客東山屐天地狂生北海杯
縱有葆光能羽化月明空待鶴歸來

介城古跡

明
曹嵩

滄海西來膠水東分茅於此見遺踪千年擬卜郊圻固
百戰惟餘瓦礫重老樹無花妖鳥集斷碑有刻亂苔封
稔知興廢由人事虛帶清流案碧峰

趵突泉

明
王在晉

大地山河氣鬱蒸
瓊漿珠瀑亂飛凌
暗噓靈谷嘗分雨
冷冽西風不見冰
石鉢龍涎聲似沸
海天鼉鼓急如鑿
源頭何處通幽漠
夜月寒潭水自澄

登日觀峯四首

明
潘之恒

東望崑崙表岱宗
排空秀色削芙蓉
銖衣結綬承華蓋
紺殿揚光見燭龍
隱几徂徠青不極
參雲碣石翠微封
扶搖欲挾滄溟日
直躡丹梯第一峯

半嶺鷓鴣午夜鳴中天鷹鶴洞簫聲靈查幾許通銀漢
香案曾參上玉京乍見彩雲青海度每依殘月赤霄行
無煩一一論封禪寂寞雲亭問主盟

河漢昭回閣道通東皇絳節下雲中鈞天初破游仙夢
閭闔高憑少女風夜半陽烏飛海鏡秋分星鳥麗霜宮
瞳瞳佳氣長安近萬里遙瞻帝日紅

太乙離宮薄絳霄扶桑海日坐相邀銀河欲滅瞰將出
金掌先承露未消雲駕六龍瓊島曙風呼萬馬巨靈朝

請看嶽頂蒼涼色遮莫霞城已建標

登泰山八首

明
謝肇淛

獨立蒼茫黯自愁天邊落木正逢秋
片雲長自依孤闕一氣誰能辨九州
馬向吳門搖匹練屋從滄海起層樓
山河指點東南盡咫尺應同萬里遊

疊嶂飛梯斷復連
曉烟寒葉轉堪憐
龍湫半向蒼藤瀉
鳥道翻從碧落懸
敗碣莓苔餘漢字
孤松風雨自秦年
尋真不覺仙源遠
覓得丹丘息萬緣

山半罡風吹竹冠洞前雲氣濕衣寒珠簾噴雪三千尺
石磴懸空十八盤禹服彈九天際盡汶河衣帶掌中看
漢家未欲論封禪檜柏森森太乙壇

中天飛閣俯崔嵬吳越諸峯面面開錯落山形皆北拱
微茫海氣自東來秦皇驅石元無字漢代祈靈漫有臺
七十二君多勝事只今斜日照蒼苔

紺殿朱宮敞碧霞樓臺縹緲玉真家鸞驂夜曉三珠樹
羽蓋朝迎七寶車天外金門馴虎豹雲中絳節動龍蛇

朝元歸去瑤池冷落盡冰桃萬樹花

半空星斗落前楹月色霜華千里平四壁烟嵐寒枕簟
幾家燈火隱山城封中白見秋雲起海底紅看夜日生
自身如王子晉平峯頂上坐吹笙

烟銷路轉翠重重洞裏花源別有峯棧道初開惟傍竹
上方乍遠不聞鐘橋西斷柱從苔蝕石面殘經受水春
欲向山僧問遺事松關深處野雲封

登臨竟日意悠哉祇恨秋城暮色催回首天邊翠微寺

却驚身自白雲來
丹梯杳靄看還失
紫府虛無夢復迴
早晚向平婚嫁畢
結廬應旁竹林隈

超然臺

明
謝肇淛

一片秋光夾色開
況逢仙令共登臺
城連平楚天邊去
雲擁羣山海上來
灘水尚寒高鳥盡
穉陵無恙夜烏哀
尊前欲洒千秋淚
往事殘碑伴綠苔

登安平鎮譙樓

明
謝肇淛

高樓遙控九河關
海岱微茫指顧間
千里飛帆衣帶水

半窗斜日錦屏山孤城粉堞連雲起平楚蒼烟逐鴈還
氛祲坐消波浪息風光贏得獨開顏

登岱

明
高有恒

懸崖怪石逼丹梯幾度尋幽傍水溪盡日嵐光迎過客
半空雲氣俯全齊登臺漢跡知何在極目吳門望轉迷
絕頂峻嶒天咫尺蒼茫只覺萬山低

小東園二首

明
公鼎

桑泉河傍小東流山外茅亭對石樓鴈字低連紅葉雨

砧聲遙送白楊秋
誰家刀尺裁明月
入望風烟繫暮愁
日似小年門似水
若無婚嫁勝浮丘

十年客路總漫漫
歸掃松花坐石壇
一自文章驚海內
便將名姓老長安
閒情雅共秋雲澹
往事愁聽暮雨寒
何處砧聲連落木
西風人自倚樓看

雲門東麓花林曠

明

劉淵甫

碧水青山何處村
百花千樹半柴門
山藏柳市無車馬
水隔桃源有子孫
問舍地偏為得計
尋幽心遠遂忘言

悠然迥出塵囂外
垂老猶矜興味存

沽河渡

國朝

法若真

飛虹北望折中流
長使蛟龍夜半愁
落落青茅遮斷壁
行行白鷺宿橫洲
慕容車騎雙沽盡
秦帝樓船大海收
直到穆陵三島外
書生何事不封侯

秋杪黃山

國朝

法若真

空亭十日得閒閒
踏徧沙痕曲水灣
黃葉長留鸚鵡谷
白雲不去鳳凰山
縱依酒甕愁皆醉
新補柴門嬾未關

莫道清秋入夜冷久疎禮數到人間

鸚鵡谷在海東鳳凰山在黃山南

登岱二首

國朝

施閏章

岱宗萬仞氣蒼蒼杖策層巔盡八荒列岫兒孫爭拱立
諸天旌節鬱相望丹霞白霧分陰霽玉簡金泥入混茫
懷古躊躇搔短髮洗頭池畔挹瓊漿

羣山冉冉下青峯迴合虛無紫氣重日出天門當漢時
雲深御帳失秦松雙崖石聚驚龍鬬四月桃開集雪封
輦道荒蕪民力盡相如禪草且從容

長白山

國朝

施閏章

雨後明霞冉冉紅浮雲猶裊半山中
多年夢想赤松子何處招尋白兔公
列嶂臨城餘礧雪虛巖面海更天風
從來副嶽誇形勝杖策憑陵孰與同

泛錦秋湖二首

國朝

唐夢賚

十載雲湖繫客思秋風短棹尚嫌遲
東山小草終何濟西塞桃花定幾時
種樹擬遮紅蓼岸買歌新製竹枝詞
名香清磬無餘事高枕蘭橈信所之

垂老林泉計始成誰能塵市了餘生將營山水為三窟
須護丹鉛當五城廬嶽爭如長白遠瀟湘何似錦秋清
卜居應號黃冠子拚與乾坤一葉輕

石門

曲阜

國朝

顏光猷

石門山寺白雲深亂雨飛花野火侵法帳空懸蓮葉散
梵鐘不響草蟲吟牛羊歷落千村滿藤桂蒼涼一逕陰
草閣昔年何處是流泉彷彿似鳴琴

宿蒙山頂

國朝

顏光敏

龜蒙遙接太山阿石屋荒臺覆薜蘿
斷壑陰森藏暮雨孤峰屈注轉銀河
丁丁樵響穿林早謾謾松濤閉戶多
曉日晴開堪望魯高吟不歎手無柯

神頭山謁李衛公祠次葉文莊韻

國朝

王士禛

蒼山深抱藥師祠駐馬橫鞭一揖之
杖策文皇龍奮日獻書西嶽螭蟠時
神歸風雨宵聲厲地僻雲嵐晝色遲
我慕人豪遺像在披帷重在拂蛛絲

登蓬萊閣

國朝
丁 蕙

畫欄朱棟俯鴻濛，四顧茫茫萬象空。
吐納江河連碧落，盪摩日月沐青銅。

青銅二字出蘇子瞻海市詩

方壺路接蛟波外，樓

閣噓成蜃氣中。到此塵囂都不染，欲乘黃鵠御天風。

題趵突泉

國朝
宮夢仁

匹馬三春兩度來，蓬飄萍轉羨靈荄。
明河孤擁天紳瀉，響雪聲連地肺開。
夜聽龍吟潛窟宅，朝疑蜃氣見樓臺。
憑軒不盡觀瀾意，却浣塵襟坐綠苔。

奉和扈從登封應制四首

國朝 毛奇齡

時維肇甲候屬升辰承六幕之清寧廣三台之效
順翠華西指東都望幸多時綵仗將臨夏諺為歡
已久因整協時之駕先酬肆覲之觀鈎陳簡肅無
煩五校蘭錡柴望精禋不事三壇茅脊所過祀名
山笑玉檢探符之陋隨時省方俗斥金泥封事之
繁惟是問俗之貞淫間修五禮就民相慰勞暫遍
羣神聿開千百年未有之恩頓釋七十君歷傳之

妄念茲輪輓築隄石以塞決河攬我提封登高丘
而望遠海謹誦卷阿之什虔贐將享之章才慙應
劬難傳西漢官儀職本蘭臺敢效東封著頌

嵯峨方岳望東巡何幸天門扈近臣磴道曉雲迴海日
石壇秋草遍山春鑾旗翻作中峰電部泰祠還上時神
千載玉泥留檢處今來沾盡屬車塵

幃殿重重倚嶂開山呼相應似鳴雷九旗總向巘邊去
萬乘疑從天半來升氣下窺青檢合裡河西眺白龍迴

盛朝功德真難紀勒石慙無作頌才

東方雄鎮護神京豫日宸遊減禁兵霜繞幔城嚴未啟
花開輦路笑相迎晴看御馬林間度夜聽天鷄海外鳴
九點齊州渾一望可知六宇正澄清

鈎陳羅列動星文佳氣龍蔥繞聖君騎接百靈巖曲稔
龍躔三觀嶺頭分春還个左乘青輅時見封中起白雲
問俗省方千聖事百年父老幾曾聞

過穆陵關

國朝

安箕

將軍峴口路盤紆東國崇關賜履餘谿谷分流通沭汶
商車夾道走淮徐捐軀戌主靈猶壯失險南燕計果疎
何處寄奴遺壘是廢興千載總成墟

蟠龍山

國朝
安 箕

崇巔傑閣敞朱櫺怪石盤紆鳥道經老柏輪囷枝盡偃
蟄龍鱗甲氣猶腥千巖重複蟠青社秋色微茫接北溟
一水故環雲壑秀那能依此結茅亭

廬山

盧童子修真處

國朝
李 藩

盧仙曾住此山巔跨鶴飛昇信有緣石洞尚留行道影
清泉猶似煮芝年多因塔上留消息想是松陰有汞鉛
惟煞道人渾不醒亂吹橫笛破蒼烟

登蓬萊閣

國朝

李樹德

海東雄鎮屬蓬萊飛閣何年畫檻開萬里鯨波浮日月
半空蜃氣結樓臺傳烽故壘風吹荻勒字高厓雨漬苔
坐鎮忻逢清晏日遙看重譯駕航來

高苑拜魯仲連墓

國朝

成永健

高風直共海天秋
氣壓燕秦動列侯
萬騎爭如一矢下
匹夫恥見六王收
勲名蟬蛻非游俠
故國牛眠認首丘
芳草斜陽獨憑弔
油油狄水漾清流

感泰山封禪遺跡

國朝 藍 岳

東巡祀典載經文
封禪誰傳七十君
松下忽來嬴氏雨
壇間似出漢皇雲
禮儀附會紛難定
檢字荒唐秘莫聞
臺碣空留遺跡在
離離荒草映斜曛

登蓬萊閣

國朝 王 革

高閣蓬萊開少日今來秋眺鬢蒼浪地雄青社臨孤迥
山古豎間接混茫鼇背雲浮雙郭外蛟涎漲落十洲旁
天風碧海斜陽在曾對清吟玉局狂

法慶寺

國朝

何世璠

臺角風清意自閒
脩然雨雪滿空山
十年宰相經行處
方丈維摩定慧間
今日無心雲出岫
他時飛倦鳥知還
拈花待與豐干約
好謂應門莫閉關

青社詩二首

國朝

方正珪

溉田垂釣想遺踪坐待功名上景鍾幾見隱身非霧豹
難從高臥識人龍鄭公書舍留長艸沂國園林賦矮松
蹈海尚尊天下士宛牆雲護若堂封

高祠羅列十三賢俎豆相沿二百年何事閭閻空斷帶
但憑長吏鑒懷磚主恩先後看陳表大業光昭有答牋
出守多憑台輔重香名清挹范公泉

石臼所觀海

國朝 方正珪

塵揚東海記何年又沒桑田納百川艸艸春秋潮有信

茫茫日月眼無邊
碁分島嶼烟含翠
光燦琉璃碧浸天
元氣包涵通沆瀣
憑誰指點揖羣仙

望岱

國朝

峻德

岱宗天半鬱相望
萬仞雄峰俯八荒
大海雲霞看滅沒
中原風雨接蒼茫
秦松漢栢知何處
日觀天門去未遑
會跨赤虬凌紫氣
朗吟絕頂叫扶桑

五言排律

春日望海

唐

太宗

披襟眺滄海憑軾翫春芳積流橫地紀疏派引天潢仙
氣凝三嶺和風扇八荒拂潮雲布色穿浪日舒光照岸
花分彩迷雲鴈斷行懷卑運深廣持滿守靈長有形非
易測無原詎可量洪濤經變野翠島屢成桑之杲思漢
帝碣石想秦皇霓裳非本意端拱且圖王

奉和聖製春日望海

唐楊師道

春山臨渤海征旅輟晨裝迴瞰盧龍塞斜瞻肅慎鄉洪
波迴地軸孤嶼映雲光落日驚濤上浮天駭浪長仙臺

隱螭駕水府汎龜梁碣石朝烟滅之采歸雁翔北巡非
漢后東幸異秦皇舉旗羽林客跋距少年場鯤擊驅遼
水鵬飛出帶方將舉青丘繳安訪白霓裳

蓬萊鎮

唐駱賓王

旅客春心斷邊城夜望高野樓疑海氣白鷺似江濤結
綬疲三入承冠泣二毛將飛憐弱羽欲濟乏輕舠賴有
陽春曲窮愁且代勞

靈巖西入石路

唐劉長卿

山僧候谷口石路拂莓苔深入泉源去遙從樹杪回香
隨青靄散鐘過白雲來野雪空齋掩山風古殿開桂寒
知自發松老問誰栽惆悵甘泉水何人更渡杯

臨邑舍弟書至苦雨寄詩用寬其意

唐
杜
甫

二儀積風雨百谷漏波濤聞道洪河圻遙連滄海高職
司憂悄悄郡國訴嗷嗷舍弟卑棲邑防川領簿曹尺書
前日至版築不時操難假黿鼉力空瞻烏鵲毛燕南吹

畎畝濟北沒蓬蒿
螺蚌滿近郭蛟螭乘九臯
徐闕深水府碣石小秋毫
白屋留孤樹青天失萬艘
吾衰同泛梗利涉想蟠桃
倚賴天涯釣猶能掣巨鰲

賦得白雲起封中

唐李正辭

千年泰山頂雲起漢王封
不作奇峯狀寧分觸石容
為霖維易得表聖自難逢
冉冉排空上依依疊影重
素光非曳練靈貺是從龍
豈學無心出東西任所從

孔廟古檜

宋趙鼎

擢秀真儒宅垂陰數仞牆封培因聖力茂悅得靈長根
踞龍蛇蟄枝延鷺鷥翔勞功施禹稷蔓草薶韓莊偃蹇
明堂幹蕭森岱嶽陽園欺漢武栢愛掩召公棠日月成
塵劫乾坤屢戰場恩仁感樵牧忠厚及牛羊不有神明
護寧逃翦伐傷歲寒千古色宜並子孫昌

遊靈巖

金張通古

萬壑千崖裏林開一逕深數年勞想望此日快登臨境
勝情難盡途危力不任樓臺相映抱松栢自蕭森花散

諸天雨燈傳古佛心鶴泉寒漱玉圍地舊鋪金石磴崎
嶇上桃溪窈窕尋淵明能止酒叔夜况携琴所恨無長
假徒勤惜寸陰清宵誰我伴乘興但孤斟

廣固城

益都

明
陳經

涼漢沈寥清登高俯固城龍岡盤地險雉堞與雲平東
望滄溟會西瞻泰嶽迎四山屏亂立一澗帶相縈十二
倅秦郡膏腴擬漢京封疆仍晉服巡狩尚堯名蔚蔚林
臯接油油禾黍成斷崖蒼蘚合絕壁紫烟橫野鹿驚人

過村鷄出樹鳴川陵五變易冠蓋幾枯榮閭閻夷丘隴
人家半牧耕近尋遐思發極覽壯懷并開口憐浮世無
涯役有生對尊聊慰意撫景媿忘情

題靈巖寺

明
王世貞

見語靈巖勝還驚忽道傍天垂孤剎出地轉萬峰藏橋
石鯨飛動烟嵐驚渺茫山形界齊魯榜字接隋唐虎坐
俄拏攫虬潛欲奮揚腦留祇樹色春勒寶花香伏水侵
禪坐歸雲護講堂慈篁深歲月忍草足冰霜飽進茵陳

飯酣眠薈蔚房微吟和清磬步屨信迴廊許掾談誰解
陶公醉不妨莫疑車馬客爾亦困津梁

再遊靈巖

明
王世貞

為捨祇園竹名山結願偏登臨恍初地徙倚更諸天不
改芙蓉色微添蘿薜烟松雲移疊嶂花語助鳴泉芒屨
青從引苔衣碧任穿井猶雙鶴浴瀑似片虹懸磬發僧
歸定燈餘客借傳新茶収月供淨甃割霞眠未叩無生
理聊追有漏緣空聞飛錫杖不見布金田盡劫終成幻

降心邁離禪祇應何所住一鉢付流年

雲門遠眺

明馮琦

設險推天府憑高望雪宮五丁開混沌一氣破鴻濛地
應虛危起山連泰岱雄摩霄橫作障潏海曲如弓洞口
明殘雨天池飲斷虹喬雲時變態恠峽轉龍從窈窕神
仙窟崢嶸造化工猿啼秋壑靜月落曉巖空萬樹圍平
楚千峰繞大東鶴聲縹緲外仙樂有無中霸業餘形勝
衣冠想會同乘時欣在德表海是皇風

登雲翠絕頂東望嶮山

明
于慎行

躡僑登丹嶂開尊矚錦岑懸厓分日月衆壑異晴陰鳥
道霞標轉泉流樹杪侵神工圖紫翠大地削崟嶸縹緲
雲生岫霏微霧出林鶴巢旁接漢猿背仰捫參藥鍊丹
爐迴書藏紫洞深依稀瑤草色彷彿玉笙音人代迷陵
谷山形自古今興餘歌爛熳秋至氣蕭森舊紉蘭蓀佩
新抽玳瑁簪登高仍望遠都寄采芝心

登靈巖

明
李化龍

攬秀山全勝探奇客再尋慈雲開覺路佛日上初林淨
域三天曉空門十里陰忘機僧化石種福地生金高閣
看人代方池閱古今鐵衣留幻相巖竇見禪心峯合規
天小臺高貯月深清泉雙鶴舞老檜萬龍吟閒寂消塵
慮清虛愜素襟皈依欣有地慙愧未抽簪

遊聖水峪

明
胡東漸

共有探幽興招尋轡可聯携壺離市井策杖入雲烟谷
口深銜寺山腰細吐泉閒然堪避俗頓爾欲逃禪小院

迴廊外岑樓疊嶂前霜餘酣柿葉風嫋韻松絃倚徙渾
忘倦登臨會有緣指迷先一衲記勝殿羣賢逼側羊腸
外崔嵬鳥道遙橫襟披大地散屐遍諸天歷落千村錯
微茫二木牽斷碑留漢篆巨石剩秦鞭玉宇捫星近珠
宮貯月偏羽花紛白社核酒薦青田魚鉢敲清梵鶴笙
吹晚延覓詩頻刻燭衍法劇生蓮淨土三乘契塵埃萬
累捐何當纔信宿底事遽言旋車馬催歸思林丘轉黯
然遠公相送處溪溜故涓涓

兗郡息馬地漢壽亭侯祠古松

國朝

高其任

息馬孤松立蒼龍拱殿門
天空橫老幹地脉啟靈根
頂曲盤如蓋枝垂覆若盆
經霜常有色斂月總無痕
向曉層雲結凌霄浩氣吞
英風千載聚勁節萬年存
但識劉為漢馬知曹與孫
扶蘇昭聖貌磅礴慰忠魂
功在三分定名留百代尊
祠留光魯國景仰共乾坤

五言絕句

陪從祖濟南太守泛鵲山湖三首

唐

李白

初謂鵲山近寧知湖水遙此行殊訪戴自可緩歸橈
湖闊數千頃湖光搖碧山湖西正有月獨送李膺還
水入北湖去舟從南浦回遙看鵲山轉却似送人來

廬山五咏

諸城

宋蘇軾

上界足官府飛昇亦何益還在此山中相逢不相識

盧放

洞

博士雅好飲空山誰與娛莫向驪山去君王不喜儒

酒飲

臺

石室有金丹山神不知秘何必露光芒夜半驚童稚

聖燈

山巖

皎皎巖下泉無人還自潔不用比三星清光同一月

三泉

長安自不遠蜀客苦思歸莫教名障日喚作小峨眉

障日

峯

玉簾泉

元

趙孟頫

飛泉如玉簾直下數千尺新月橫簾鈎遙遙掛空碧

桃花峪

泰安

元

張志

流水來天洞人間一脈通桃源知不遠浮出落花紅

北渚亭

歷城

明
李攀龍

窻中采蓮舟落日菱歌起坐見浣紗人紅顏照秋水

丁香灣

歷城

明
李攀龍

平灣澹不流寒影千峯入斜陽一以照彩翠忽堪拾

桃花嶺

海豐

明
李攀龍

一度桃花嶺烟霞處處新縱迷源上路猶似武陵人

登泰山

明
楊繼盛

志欲小天下特來登泰山仰觀絕頂上猶有白雲還

五大夫松

明屠隆

高節栖靈嶽寧汙嬴氏官天風吹不斷濤捲萬峯寒

無字碑

明鄒德溥

絕巘植空碑古人如有意由來最上乘原不立文字

玉女池

明龔勉

山池水碧澄照徹芙蓉面玉女時往來彩雲飛片片

荏平懷古四首

國朝王士禎

經過射書處猶識魯連村桑柘靈祠裏空瞻玉貌存

魯仲

連

玉釵掛臣冠滅燭聞薌澤此際獨留髡僕亦堪一石

淳于

髡

火色鳶肩者相逢徧五都不知曾一箇得似馬周無

馬周

湖海鬚眉在寧忘社稷讐張公琴酒客能辦殺閭丘

張鎬

孤駘山

滕縣

國朝

王士禎

髡何年事傳聞此伐邾至今歌小子猶似怨侏儒

諸葛武侯祠

新城

國朝

王士禎

不見錦官城猶聞蕩陰里蘆荻夕陽中空祠映寒水

鷺鴨城

新城

國朝

王士禎

傳是慕容城殘荷沒碑影復道阿超年金鵝紀元鼎

錦秋亭

新城

國朝

王士禎

蘇公不可見湖水猶今昨斜日古亭閒水花自開落

長白山

國朝

徐夜

泰岱茲以東雲同山一色中有白鹿仙欲訪不可得

六言絕句

宿甌山

滋陽

唐韓翃

山中今夜何人闕
下當年近臣青瑣
應須早去白雲何
用相親

別甌山

唐韓翃

一身趨侍丹墀西
路翩翩去時惆悵
青山綠水何年更
是來期

冶泉二首

臨朐

明馮惟善

對立長松百尺旋栽新竹千竿山月一鉤初上溪風半夜猶寒

巖際烟光低戶溪邊暝色入樓好月故侵書幌清宵不下簾鉤

夜度泰山

明王術

山下溪流暗響林間野火遙明雲氣斷時月上霜華聚處寒生

七言絕句

魯東門泛舟二首

唐李白

日落沙明天倒開，波搖石動水潾潾。
輕舟泛月尋溪轉，疑是山陰雪後來。

水作青龍盤石隄，桃花夾岸魯門西。
若教月下乘舟去，何啻風流到剡溪。

蘭陵客中

嶧縣

唐李白

蘭陵美酒鬱金香，玉碗盛來琥珀光。
但使主人能醉客，不知何處是他鄉。

不夜城

文登

唐
獨孤及

涼風臺上三更月不夜城邈萬里沙離別莫言關塞遠
夢魂長在子陵家

送齊山人歸長白山

唐
韓翃

舊事仙人白兔公掉頭歸去又乘風柴門流水依然在
一路寒山萬木中

題宋氏五女舊居

宋氏姊妹五人
貞元中同入宮

唐
竇常

謝庭風韻婕妤才天縱斯文去不迴一宅柳花今似雪

鄉人擬築望仙臺

即今恩縣之四女樹也
一作四女寺詳見古蹟

海上

唐李商隱

石橋東望海連天徐福空來不得仙直遣麻姑與搔背
可能留命待桑田

聊城

唐汪遵

刃血攻聊已越年竟憑儒術罷戈鋌田單漫逞燒牛計
一箭終輸魯仲連

東海

唐汪遵

東巡玉輦委泉臺徐福樓船尚未回
自是祖龍先下世不關無路到蓬萊

表海亭

益都

宋范仲淹

一帶林巒秀復奇每來憑檻即舒眉
好山深會詩人意留得夕陽無限時

遊石子澗二首

益都

宋范仲淹

鑿開奇勝翠微間車騎笙歌暮未還
彥國才如謝安石

他時卽此是東山

飛泉落處滿潭雷一道蒼然石壁開故老相傳應可信
此山雲出雨須來

呂公洞

泰安

宋
范致冲

朝遊北海暮瀛洲仙珮何年到此遊安得相從問丹訣
春風同醉岳陽樓

竹林寺

泰安

宋
范致冲

竹林深處有招提靜掩禪關過客稀
簷蔔花開春欲暮

冷冷鐘磬白雲低

登華不注望鮑山

宋 曾 鞏

雲中一點鮑山青東望能令兩眼明
若道人心似矛戟
山中那得叔牙城

離齊州後四首

宋 曾 鞏

雲帆十幅順風行卧聽隨船白浪聲
好在西湖波上月
酒醒還對紙窗明

文犀剌刺穿林筍翠玉田田出水荷
正是西亭銷暑日

却將離恨寄烟波

將家頻向習池遊
難放西湖十頃秋
從此七橋風與月
夢魂常到木蘭舟

荷氣夜涼生枕席
水聲秋醉入簾帷
一帆千里空回首
寂寞船窗祇自知

過梁王臺

宋 石延年

梁王力戰輔炎劉
百二山河一旦收
千古高臺遺舊恨
功名何不效留侯

勞山 一名鰲山

元丘處機

卓犖鰲山出海隅
霏微靈秀滿天衢
羣峯削玉幾千仞
亂石穿空一萬株

烟霞洞四首

寧海

元丘處機

山雲勃勃擁驚濤
海水漫漫浸巨鰲
極目下觀千萬里
扶桑依約見蟠桃

白石粼粼繞洞泉
蒼松鬱鬱鎖寒烟
碧桃花發朱櫻秀
別是人間一洞天

海上羣山培塿多姑餘高峻出陂陀太平直與稽天翠
五岳高標未見過

海曲山阿洞府低蓬壺閬苑海東西仙人玉女時遊集
不許桃源過客迷

東城

元 趙孟頫

野店桃花紅粉姿陌頭楊柳綠烟絲不因送客東城去
過盡春光總不知

堂邑宣化堂退食

元 張養浩

縣齋公退炷鑪熏聊為塵煩一解紛開戶不教香遠去
簾紋浮動半窻雲

鯨背吟詩尾聯以古句

元
宋
无

崖倚波濤頂接空黃鸝遊處樹成叢莫言山上人希住
多少樓臺煙雨中

鸝
遊山

東溟雲氣接蓬萊徐福樓船此際開應是秦皇望消息
採芝何處未歸來

東洋

積沙成島浸蒼空古祀龍妃石崦東亦有遊人記曾到

昔年今日此門中

沙門島

萊州洋內浪頻高
釘鐵千尋繫不牢
傳與海神休恣意

二三升水作波濤

萊州洋

穆陵關

明

薛瑄

萬山絕頂穆陵關
一上山樓五月寒
烟樹滿川浮暝色
晚風吹雨濕欄干

膠州道中

明

薛瑄

數點青螺海上山
參差樓閣海天寬
行臺五月不知暑

只覺侵人海氣寒

汶口

明
喬宇

九峯南望碧差峩汶水平添一丈波渡口客來休便過
北溪山雨正滂沱

濟寧

明
殷雲霄

太白樓前春水多南湖春老白蘋波白蘋波上風還雨
欲採芙蓉將奈何

蓬萊閣後四絕

明
王世貞

東望麗磯插漢高坐來峯嶼小秋毫不知雲霧連波長
漫道任公已釣鰲

高城鐘鼓喚蒼茫海若鎔波浴太陽綺色中天徐散盡
空青一點是扶桑

不盡滄波返照紅千尋霞錦感回風中流忽迸真珠起
知是垂天飲白虹

杖底秋風憶舊遊題詩應在閣東頭長令風雨千山合
不逐星辰五夜收

嶧山白雲洞

明 李化龍

萬轉千迴路不平行來足下白雲生
白雲散盡人歸去
山自蒼蒼月自明

秦松

明 魏允貞

雨中松幹倚嶙峋不洗東風舊日塵
何似桃花含意遠
武陵只戀避秦人

登泰山三首

明 李中行

杖底風生萬壑鐘鬱蔥深處是秦封
封身游雲際窺三島

日下天門見五松

日躍扶桑大海東
黃河南望隔烟籠
欲分武帝金莖露
或出仙人掌握中

鈎陳太乙逼清虛
無字碑橫白日餘
松老苔荒人自古
尚餘豐石即焚書

遊明湖二首

明
李中行

佛山影落鏡湖秋
湖上看山翠欲流
花外小舟吹笛過
月明香動水雲舟

北極仙祠白玉闌
燒香女伴鬪雲鬟
憑高笑撚荷花蒂
指點湖東看嵒山

歷下名泉詠

國朝

晏璧

金線池邊楊柳青
泉分石竇曉泠泠
東風三月飄香絮
一夜隨波化綠萍

柳絮泉

杏花開遍柳垂絲
柳下清泉漾碧漪
莫折柔條留繫馬

綠陰深處聽黃鸝

柳泉

淺井東邊有冽泉
山僧洗鉢是何年
泉中流出伊蒲餌

參透三生石上禪

洗鉢泉

齊城淺井不盈尺一掬能令塵慮消日暮兒童餅汲處

芭蕉葉上雨瀟瀟

淺井泉

泉脈如懸黍米珠源頭活水世間無洞中恐有驪龍臥

吐出香涎下嵒湖

懸珠泉

泉如熨斗氣溫溫龍洞分來第一源欲識坎離交媾意

請參道德五千言

熨斗泉

百尺深泉石上懸龍歸洞口散晴烟曾從五老觀飛瀑

倒挽銀河落九天

懸泉

泉名劉氏果何人千載風流憶伯倫天產釀泉清可掬

松花滿泛甕頭春

劉氏泉

曲阜詞四首

國朝

顏光猷

城郭蕭條三兩家高林喬木有啼鴉仙源舊治何人問

五月空庭落棗花

仙源城

春暮臺高露未晞桃花飛漲掩荆扉當年童冠隨遊處

惟有空城獨鳥歸

舞雩臺

踏青城外柳含烟繫馬開尊遠水邊隔望誰家千畝竹

聲搖風雨弄清泉

達泉

樓外春溪引逕斜覆堤桃李爛明霞河陽兄弟渾無事

尊酒年年趁落花

龍灣

漆園城

荷澤

國朝

陳廷敬

隱吏何人解息機漆園漠漠草霏霏只今夢隔三千載
惟見春來蝴蝶飛

裙帶河

古名女水東海龍女曾隱於此

國朝

王士禎

龍女波寒夕照餘微風裙帶響瓊琚洞庭社橘凋零盡
誰寄秦川柳毅書

魚山神女祠

王維有魚山神女祠歌

國朝

王士禎

雲車入洛幾時還松桂淒涼滿舊山歌罷迎神送神曲
山青無際水潺湲

東平思王墓

瓠山

國朝

王士禎

東平幾驛是咸陽松栢依然指故鄉帝子不須還悵望
漢家陵闕久淒涼

東平憲王墓

崂山

國朝

王士禎

鄉是人亡萬古悲東平宮殿草離離陵前賜劍知何處
金粟飄零剝斷碑

嶧山卽事

國朝

王士禎

雨足烟村事不閒家家驅犢出柴關棗花香徧穠陰合
水碧沙明望嶧山

古於陵城

國朝

徐夜

仲子城邊日向中田家饁畝自西東高原雨脚牛羊外

一徑秋深豆葉風

謁東方祠二首

國朝 田雯

古廟寒烟厭次雲
鴉飛黑陣冒斜曛
周圍滿樹桃花放

茅屋二間二細君

小院依樓九尺身
欄間布穀雨聲頻
村農來賽雞豚社
不是尋君射覆人

山東通志卷三十五之一下